

आकाशवाणी जयपुर—अजमेर

प्रादेशिक समाचार

दिनांक 02.07.2024 समय: 18.45 बजे

- प्रधानमंत्री नरेंद्र मोदी कह्यो—वां रा राज मांय सगळा सारू न्याय री नीति अपनायी ज्यी ।
- राज्य मंत्रिमण्डल री मीटिंग मांय कोटा मांय ग्रीन फील्ड हवाई अड्डो बणावण समेत केई खास फैसला कीना ।
- विधानसभा रो दूजो सत्र काल सरू व्हेला—ई सत्र मांय प्रदेश रो पूरो बजट पेश कर्यो जावेला ।
- राज्यपाल कलराज मिश्र कह्यो—नुवी शिक्षा नीति नौकरी—धंधा मुहैया करावण सागे चरित्र बणावण मांय ई मददगार ।

0000

प्रधानमंत्री नरेंद्र मोदी आज लोकसभा मांय राष्ट्रपति रा अभिभाषण परां धन्यवाद प्रस्ताव माथे व्ही चर्चा रो जवाब दीनो । ई दौरान प्रधानमंत्री कह्यो के वां रा राज मांय सगळां सारू न्याय अर किण ई भांत रो तुष्टिकरण नी करण री नीति काम ली जा रही है । वे कह्यो के गलत प्रचार रे बावजूद विपख ने लोकसभा चुनाव मांय करारी हार रो सामो करणो पड्यो । मोदी आम चुनाव मांय परिपक्व सोच अर समझदारी रो दरसाव करण सारू देश री जनता री सराहवणा कीनी । प्रधानमंत्री कह्यो के जनता वां री सरकार री नीतियां, इरादां अर समर्पण माथे भरोसो जताता थकां एनडीए ने लगातार तीजी दफा सत्ता मांय लावण सारू वोट दीनो । वे कह्यो के वां री सरकार सबका साथ, सबका विकास रा मंत्र सागे काम कर रही है । प्रधानमंत्री रा जवाब रे दौरान विपख रा सदस्य न्यारा—न्यारा मुद्दां माथे विरोध प्रदर्शन कीनो । लोकसभा अध्यक्ष ओम बिरला विपख रा आचरण माथे नाराजगी जताता थकां सदन मांय व्यवस्था बणायी राखण बाबत कह्यो ।

0000

मुख्यमंत्री भजनलाल शर्मा री सदरत मांय आज राज्य मंत्रिमंडल री मीटिंग व्ही । मीटिंग मांय राज्य मांय कांग्रेस रा राज मांय बणायी ज्यो गांधी वाटिका न्यास ने भंग करण रो फैसलो करी ज्यो, हालांकि गांधी वाटिका चालती रेहवेला । मंत्रिमंडल री मीटिंग मांय कोटा मांय ग्रीन फील्ड हवाई अड्डो बणावण रो फैसलो करी ज्यो । मीटिंग पाछे उप मुख्यमंत्री प्रेम चंद बैरवा अर मंत्री राज्यवर्धन राठौड़ अर जोगाराम पटेल खबरनवीसां ने मीटिंग मांय करी ज्यो फैसला रा बारा मांय जाणकारी दीनी । मंत्री राज्यवर्धन राठौड़ बतायो के भीलवाड़ा, किशनगढ़ अर झालावाड़ मांय हवाई जहाज उड़ावण री सिखावण देवण वाळी स्कूलां खेळी जावेला । वे कह्यो के प्रदेश मांय कुछ हवाई अड्डा माथे सामान लावण ले जावण रो सुबीतो ई मुहैया करायो जावेला । वे कह्यो के सरकार सरकारी नौकरियां अर उद्योग धंधा ने बधावो दे रही हैं । राठौड़ कह्यो के आईटीआई अर पॉलिटेक्निक कॉलेजां ने और बेहतर बणाया जावेला ।

.....

मंत्री जोगाराम पटेल बतायो के राज्य रा पैली वाळा मुख्यमंत्री अशोक गहलोत मुख्यमंत्री भजनलाल शर्मा सागे मुलाकात कर र गांधी वाटिका जनता सारू बेगी सरू करण री मांग कीनी ही, जिण ने ध्यान राखता थकां राज्य सरकार बेगी ही गांधी वाटिका सरू करेला । वे बतायो के गांधी वाटिका चलावण सारू बणायी ज्यो ट्रस्ट मांय खामियां ने ध्यान राखता थकां कैबिनेट इण ने रद्द करण रो फैसलो कीनो । मीटिंग मांय काल सरू व्हेवण वाळा विधानसभा रा बजट सत्र री तैयारियां रा बारा

मांय ई विचार करी ज्यो। मीटिंग रे दौरान विधानसभा मांय पेश कर्या जावण वाळा बिलां अर प्रतिवेदनां रा बारा मांय कैबिनेट री मंजूरी लीरीजी। मुख्यमंत्री रा दफतर मांय व्ही ई मीटिंग मांय न्यारा-न्यारा महकमा ऊं जुड्या सवालां रा असरदार तरीका ऊं जवाब पेश करण रा बारा मांय ई चर्चा करी ज्यी।

0000

विधानसभा रो दूजो सत्र काल सरू व्हेला। विधानसभा सचिवालय ई सत्र ऊं जुडी सगळी तैयारियां पूरी कर लीनी है। सत्र मांय वित्त मंत्री प्रदेश रो पूरो बजट पेश करेला। ध्यानजोग है के सदन रा लारला सत्र मांय राज्य रो अंतरिम बजट पेश करी ज्यो हो। सत्र मांय न्यारा-न्यारा मुद्दां माथे हंगामो व्हेवण रा आसार है। सदन रो सत्र सरू व्हेवण ऊं पैली काल सत्ता पख अर विपख रा विधायक दल री मीटिंग रो प्रस्ताव करी ज्यो है। ई सत्र मांय सरकार री ओर ऊं केई बिल अर प्रतिवेदन सदन मांय पेश कर्या जावेला।

0000

केन्द्र सरकार राष्ट्रीय परीक्षा एजेंसी-एनटीए मांय मजबूत तंत्र विकसित करण सारू विद्यार्थियां अर वां रा मायतां ऊं सुझाव अर राय मांगी है। सूचना अर प्रसारण मंत्रालय री ओर ऊं करी ज्यो सोशल मीडिया पोस्ट रे मुजब डॉ. के. राधाकृष्णन री सदरत वाळी आला दर्जा री समिति विद्यार्थियां अर वां रा मायतां ऊं परीक्षा री प्रक्रिया मांय सुधार, डेटा सुरक्षा प्रोटोकॉल मांय सुधार अर एनटीए री संरचना अर काम करण रा तरीका रा बारा मांय सुझाव अर विचार 7 जुलाई ताई भेजण बाबत कह्यो है।

0000

देश मांय एक जुलाई ऊं लागू व्हेया तीन नुवा आपराधिक कानूनां रा बारा मांय जाणकारी देवण सारू राजसमंद मांय आज कार्यशाला राख्यी ज्यी। इण मांय सम्बन्धित पुलिस थाणा रा कर्मचारियां सागे एस.पी. मनीष त्रिपाठी अर पुलिस रा दूजा अहलकार ई सिरकत कीनी। कार्यशाला मांय दिल्ली बार काउंसिल रा सदस्य अनन्त अस्थाना नुवा कानूनां रा प्रावधानां रा बारा मांय जाणकारी दीनी। एस.पी. बतायो के पुलिस रा करीब 700 कर्मचारियां ने नुवा कानूनां रा बारा मांय सिखावण दीरीजी।

0000

उपभोक्ता मामलात विभाग रा मंत्री सुमित गोदारा भारतीय मानक ब्यूरो अर उपभोक्ता मामलात विभाग ने मिल र सोना री शुद्धता अर मानकां री जाणकारी सारू प्रदेश मांय उपभोक्ता जागृति अभियान चलावण रा हुकम दीना है। गोदारा कह्यो के ग्राहक सोना मांय खोट, गुणवत्ता, मानकां अर हॉलमार्किंग ऊं अणजाण रेहवे है, ई कारण सोना अर इण ऊं बण्या गहणा री खरीदी रे दौरान मोटा पैमाना माथे वे शोषण रा शिकार व्हे है। मंत्री कह्यो के इण ने रोकण सारू जाग जगावण बाबत अभियान चलायो जावणो चाहिजे। ई हुकम पाछे दोन्यू महकमा मिल र 9 जुलाई ने जयपुर मांय राज्य स्तर रो सिखावण कार्यक्रम राख्यो जावेला। उपभोक्ता मामलात विभाग रा प्रमुख शासन सचिव भास्कर ए सावंत अर भारतीय मानक ब्यूरो री क्षेत्रीय निदेशक, कनिका कालिया बतायो के केन्द्र सरकार सोना रा गहणा माथे साल 2021 ऊं हॉलमार्क निशाणी जरूरी कर दीनी है। सावंत बतायो के हॉलमार्क निशाणी वाळा गहणा री खरीदी री बगत भारतीय मानक ब्यूरो रो निशाण अर कैरेट सागे छह अंक वाळो अल्फान्यूमेरिक कोड जरूर देख्यो जावेणो चाहिजे।

0000

राज्यपाल अर विश्वविद्यालयां रा कुलाधिपति कलराज मिश्र कह्यो है के कौशल विकास आधारित नुवी शिक्षा नीति नौकरी-धंधा रा मौका मुहैया करावण सागे चरित्र बणावण वाळी अर ज्ञान-विज्ञान अर आध्यात्मिक विकास ने बधावो देवण वाळी है। वे आज कोटा विश्वविद्यालय रा दीक्षांत समारोह मांय बोल रह्या हा। राज्यपाल कह्यो के शिक्षा केवल किताबां मांय नी मिले है, बल्कि शिक्षक रा व्यवहार ऊं ई हासिल करी जा सके है।

जळसा मांय साल 2021 री परीक्षा मांय मेरिट मांय आवण वाळा अर पीएचडी करण वाळां ने उपाधियां दीरीजी। ई दौरान 18 लड़कां अर 42 लड़कियां ने सोना रा तमगा दे र नवाजी ज्यो। राज्यपाल फार्मसी बिल्डिंग, लड़कियां रा हॉस्टल अर सिंथेटिक ट्रैक ई जनता ने संप्या।

000

प्रधानमंत्री नरेन्द्र मोदी आज एनडीए संसदीय दल री मीटिंग ने संबोधित कीना। वे सांसदां ऊं संसद रा कानून कायदा री पालना करण, संसदीय लोकतंत्र रा सिद्धान्तां रे मुजब चालण अर संयमित व्यवहार करण बाबत् कह्यो। मीटिंग पाछे संसदीय कार्यमंत्री किरन रिजिजू खबरनवीसां ने बतायो के प्रधानमंत्री कह्यो के देश री सेवा सारू चुणी ज्या हर पार्टी रा सांसदां री देश री सेवा री सब ऊं मोटी जिम्मेदारी है।

000

बाड़मेर जिला री सगळी ग्राम पंचायतां मांय 4 जुलाई ऊं सम्पूर्णता अभियान चलायो जावेला। म्हाणा खबरनवीस बतायो के ई अभियान रा बारा मांय आज रामसर मांय खास मीटिंग राख्ही ज्यी।

.....

0000

प्रदेश मांय आज ई केई ठोड़ां बिरखा व्ही। चूरू मांय बिरखा ऊं केई ठोड़ां सड़कां माथे पाणी भर ग्यो, जिण ऊं आवण-जावण मांय परेशानी व्ही। श्रीगंगानगर मांय सिंज्या री पोर जोरदार बायरो बाजण सागे बिरखा व्ही। तेज हवा रे कारण केई ठोड़ां बिजली रा खम्भा अर होर्डिंग पड़ गया। सलूबर जिला मांय एक सप्ताह ऊं व्हे रही बारिश पाछे किसान सोयाबीन अर मक्का री बुवाई री तैयारी मांय लाग गया है। ई दफ़ा सोयाबीन अर उड़द री बत्ती बुवाई व्हेवण री संभावना है। मौसम केन्द्र जयपुर रे मुजब काल जयपुर, कोटा, भरतपुर, अजमेर, उदयपुर, बीकानेर अर जोधपुर संभाग मांय केई ठोड़ां बिरखा व्हेवण रा आसार है।

000

14 अर 17 साल उम्र री टाबरियां री 53 वीं संभाग स्तर री खो-खो होड़ आज सवाईमाधोपुर रा पीएम श्री केंद्रीय विद्यालय मांय सरू व्ही। स्कूल रा प्रिंसिपल राजेश्वर सिंह बतायो के होड़ मांय जयपुर संभाग रा केंद्रीय विद्यालयां री 17 टीमां री 198 टाबरियां सिरकत कर रही है। अ होड़ लगातार दूजा साल पी एम श्री केंद्रीय विद्यालय सवाईमाधोपुर मांय राख्ही जा रही है।

000